

萬有文庫

第一集一千種

王雲五主編

宋元學案

(三)

黃宗羲著

商務印書館發行



宋元學案

(三)

黃宗羲著

國學基本叢書

宋元學案

卷六

士劉諸儒學案表

士建中	趙狩 <small>別見泰山學案。</small>
	私李縑 <small>別見泰山學案。</small>
劉顏	子庠
<small>附師高弁 並泰山同調</small>	曹起 <small>附見泰山學案。</small>
王開祖	張洞 <small>別見泰山學案。</small>
丁昌期	子寬夫
	子廉夫
	子志夫
吳師仁	弟師禮

宋元學案 三 士劉諸儒學案表

楊適

王說

見下鄞江家學。

杜醇

王致

從子說

子珩

孫勳

曾孫

正己

從子該

子瓘

周師厚

子鏗

見上西湖門人。

子銖

史簡

子詔

見上西湖門人。

豐稷

別見范呂諸儒學案。

袁穀

見下西湖門人。

汪洙

子思溫

孫大猷

別見餘山學案。

姚莘

俞偉

陳攄

樓郁

子常

元孫

鑰別見邱劉諸儒學案。

並安定同調

豐稷 別見范呂諸儒學案。

袁穀 子灼

元孫 燮 別爲絜齋學案。

羅適 別見安定學案。

周鏗

史詔 孫浩 別見橫浦學案。

曾孫 彌忠

曾孫 彌章

曾孫 彌林

並見慈湖學案。

舒亶

章望之

黃晞

並古靈同調。

侯可 孫仲良 別見劉李諸儒學案。

申顏

並關學之先。

宇文之邵

蜀學之先。

士劉諸儒學案

祖望謹案慶歷之際。學統四起。齊魯則有士建中。劉顏夾輔泰山。而與浙東則有明州楊杜五子。永嘉之儒志經行二子。浙西則有杭之吳存仁。皆與安定湖學相應。閩中又有章望之黃晞。亦古靈一輩人也。關中之中侯二子。實開橫渠之先。蜀有宇文止止。實開范正獻公之先。筆路藍縷。用啓山林。皆序錄者所不當遺。述士劉諸儒學案。梓材案是卷學案。亦謝山所特立。吳存仁當作師仁。

泰山同調

評事士熙道先生建中

士建中字熙道。鄆州人也。雲濠案謝山劄記云。大名府魏縣人也。孫泰山講學。先生同時而起。泰山之所

推重者。先生爲第一。而石徂徠其次也。泰山贈徂徠詩曰。攘臂欲爲萬丈戈。力與熙道攻浮譎。又嘗薦之范文正公。而徂徠高視一切。其所服膺。自泰山外。惟先生。其集中與蔡副樞書。薦之尤力。先生所著述。如道論。以言帝王之道。原福以究禍福之本。原鬼以明鬼神之理。隨時解以著守正背邪。遺近趨遠之說。皆醇儒之言也。其後以進士授評事。宰魏。不知其官爵所止。雲濠案劄記云。校書郎。

祖望謹案。先生嘗以泰山五十未娶妻。謀爲之買田宅以置室。其古道可想。至于箴規徂徠。謂其未抵中道。尤切當其弊。是真伊洛以前躬行君子。而世無傳者。祖望葺學案。聊爲之補傳。使不至泯泯焉。

主簿劉子望先生顏附師高弁

劉顏字子望。彭城人也。少孤。好古學。不專章句。師事高侍御弁。舉進士第。以試祕書省校書郎。知龍興縣。坐事免。久之。授徐州文學。居鄉里。教授數十百人。探漢唐奏議爲輔弼名對。馮元劉筠錢易蔡齊上其書。除任城主簿。歲饑。發大姓所積粟。活數千人。李文定迪知兗州青州。皆辟爲從事。卒。著儒術通要經濟樞言復數十篇。石徂徠見其書。歎曰。恨不在弟子之列。子庠參史傳。

安定同調

進士王儒志先生開祖

王開祖字景山。永嘉人也。學者稱爲儒志先生。皇祐進士。不仕。杜門著書。從學常數百人。復以薦召試賢良方正。未赴而卒。先生見道最早。所著有儒志編。言復者性之宅。无妄者誠之原。又言學者離性而言情。

奚情之不惡。又曰：使孔子用于當時，則六經之道反不如今之著。又言：由孟子以來，道學不明，今將述堯舜之道，論文武之治，杜淫邪之路，開皇極之門，吾畏天者也，豈得已哉。其言如此，是時伊洛未出，安定泰山徂徠古靈諸公甫起，而先生之言實遙與相應，永嘉後來問學之盛，蓋始基之，惜其得年僅三十有二，未見其止，爲可惜也。

儒志編

形容不欺芻木，幽晦不欺鬼神，言而不欺童昏，動而不欺愚懵，凝目于鼻，游心于帶，是制心者也。非治心者也。坐則見其存于室，行則見其立于輿，是治心者也。非養心者也。

中夜息于幽室之中，吾心之清明者還矣。孝弟忠信生乎此時，舜與周公坐以待旦，急吾行而不忘也。心動則氣窒，心外慮則氣昏耗。

情本于性，則正離于性，則邪。

君子之道，始于復，成于泰，極于夬。小人之道，始于姤，成于否，極于剝。

君子之德，莫不原于誠，誠則物之來也如鑑。

君子有天下之私，小人有一身之公。

膠柱不能求五音之和，方輪不能致千里之遠，拘庸庸之論者，無通變之略，持規規之見者，無過人之功。燭乘之者，莫若隨之者，見之明矣。弈爲之者，不若睹之者之詳也。人之智長于人，短于己，求人之是非，易求己之是非難。李翱曰：凡慮己事則不明，斷他人事則必明。己私而他人公也，言不行則言隱，知不行則

知隱。

道之充者。須時以用之。物之穉者。須澤以養之。須時者。養人。須澤者。養于人。此君子小人之分也。

丁經行先生昌期附子寬夫廉夫志夫。

丁昌期者。永嘉人也。學者稱爲經行先生。永嘉師道之立。始于儒志先生王氏。繼之者爲塘奧先生林氏。安定古靈之再傳也。而先生參之。其家世以篤行稱。至先生尤明經術。嘗築醉經堂以講學。三子。寬夫。鄉貢進士。廉夫。舉八行。志夫。進士。兄弟好古清修。自相師友。各以所得質于其父。不爲苟同。曰。此理天下所共。不可爲家庭有阿私也。尤斥去浮屠之說。喪祭無不本古禮云。

宮教吳先生師仁

吳師仁。字坦求。錢塘人。陳古靈爲郡守。以遺逸薦于朝。元祐初。召爲太學正。遷博士。後充吳王宮教授。卒。先生履行醇正。器識高遠。嘗肄業太學。名聞縉紳。應舉不第。退居田里。甘貧守道。每授學者。以誠明義理之學。而不爲異端之說。士習爲之嚮風。參兩浙名賢錄。

粹村謹案。謝山學案序錄稿底及刊本。並作杭之吳存仁。徧閱簡策。古靈時杭之鄉先生。止有名師仁者。存仁之存。當由筆誤。

助教楊大隱先生適

楊適。字安道。慈溪人。隱居大隱山。爲人醇厚介特。議論辯博。平正。人有善則稱之。不善如未之聞。爲學要行乎己。惟恐爲人所知。譽毀榮辱。不以動其心。人莫得而親疎。蓋自比仲元。叔度之流。鄉人嚴憚之。相語。

不以名氏而尊之曰大隱先生。衣食纔自給，非義之餽，一介不取。躬耕養親，族之貧者分賑之。鄰盜其稼，人告之。先生愀然曰：彼窮厄而求其生爾，勿治也。盜聞之，慚悔。其後無敢侮者。善言治道，究歷代治亂之原。孫威敏公沔自諫官出案浙東西刑獄，欲見先生，先生不肯見。先生之越，時范文正公守越，聞之，就見焉。輿致府中，澹焉無求。公益賢之。先生治經，不守章句，黜浮屠老子之說，歌詩卓越超邁，容儀甚偉，衣冠儼如始友錢塘林逋。後與同郡王致杜醇結交，後進莫不師之。退處四十年，德行益高，名聞京師。仁宗詔求遺逸，太守鮑柯以名聞，賜以粟帛。太守錢公輔又薦之，授將仕郎，試太學助教。州遣從事致詔書袍笏，輿從迎之。先生辭不受。遁去。年七十有六，遺令篆石壙前曰：宋隱人之墓。熙寧二年，滎陽張岫爲文表之。參四明文獻集。

學師杜石臺先生醇

杜醇者，越之隱君子也。居慈溪，學以爲己，隱約不求人知。孝友稱于鄉里，耕桑釣牧，以養其親。經明行修，學者以爲模楷。慶歷中，鄞始建學，縣令王文公安石請先生爲之師。其書曰：天之有斯道，固將公之。我先得之，而不推餘于人，使同我所有，非天意且有所不忍也。願先生留聽而賜臨之。安石與有聞焉。先生引孟子柳宗元之說以辭，再書強起之，曰：孟子謂好爲人師者，謂無諸中而爲有之者。豈先生謂哉？彼宗元惡知道韓退之毋爲師，其孰能爲師？天下士將惡乎師哉？先生始就焉。慈溪令林肇立學，又起先生爲師，亦固辭。王文公作師說以勉之，二邑文風之盛，自先生始。先生談詩書不倦，爲詩質而清。當時謂學行宜爲人師者也。同上。

謝山慶歷五先生書院記曰。夷攷五先生。皆隱約草廬。不求聞達。而一時牧守來浙者。如范文正公。孫威敏公。皆摳衣請見。惟恐失之。最親近者。則王文公。乃若陳賈二相。非能推賢下士者也。而亦知以五先生爲重。文公新法之行。大隱石臺。鄞江已逝。西湖桃源尙存。而不肯一出。以就功名之會。年望彌高。陶成倍廣。數十年以後。吾鄉遂稱鄒魯。邱樊。緼褐化爲紳纓。其功爲何如哉。

處士王鄞江先生致

王致字君一。鄞縣人。與同郡楊杜二先生爲友。俱以道義化鄉里。諸生子弟師尊之。稱三人皆爲先生。嘗與牧守言政事。王文公安石復書曰。無事于職。而愛民之心。乃至于此。可以爲仁矣。年七十。樂道安貧。妻收遺棄。子拾墮樵。浩然無悶。鄉人莫不高其行。參四明文獻集。

謝山辯鄞江墓誌曰。鄞江先生極爲荆公所重。其墓誌係荆公作。然不載于集中。惟舊志引其語曰。四明立言之士。自先生始而已。至聞藥泉作鄞縣志。始盡錄其全文。予疑其穴蔓。不類荆公文體。及觀其所記門人弟子。自豐稷袁穀周師厚諸人外。又稱遊學者有張機張邵張郄張祁。攷郄祁皆邵之弟。邵係徽宗宣和三年進士。建炎初。假禮部使金。補其弟祁爲明州觀察推官。遂家焉。邵于紹興十三年歸自金。二十五年卒于廣德。而鄞江先生卒于至和二年。邵兄弟能遊學其門。最少亦不下弱冠。而自至和以及宣和。凡六十七年。始登第。又八年始使金。留十四年。乃歸。又十二年始卒。抑何其長年也。以豐尙書之輩行。相去幾三世。而謂其同門。不亦謬乎。或曰。桃源先生爲鄞江之猶子。邵兄弟或嘗經受業。而誤以爲鄞江。此于時代尙不甚遠。然卽如此說。而誌文之出于依託。可知也。

梓材謹案鄧江墓誌云。上聞其德行。召拜校書郎。命至。則先生不起。謝山以此誌爲依託荆公之作。惟荆公文集弔先生詩作悼王處士。故第以處士標之。

正議樓西湖先生郁

樓郁字子文。自奉化徙鄞。卜居城南。志操高厲。學以窮理爲先。爲鄉人所尊。處窮約屢空。自樂。慶歷中。詔郡縣立學。延致鄉里有文學行義者爲之師。先生掌教縣庠者數年。又教授郡學。前後三十餘年。學行篤美。信于士友。一時英俊。皆在席下。門人之知名者。清敏豐公。縷光祿袁公。毅天台羅公。適也。登進士第。調廬江主簿。自以祿不及親。絕仕進意。以大理評事終于家。有遺集三十卷。贈正議大夫。子孫皆踵世科。五世孫鑰。德行文章。爲時名臣。仕至參知政事。參四明文獻集。

謝山五先生書院記曰。五先生之著述。不傳于今。故其微言亦闕。雖然。排奸詆奩。讜論屢屢。豐清敏之勁節也。急流勇退。渠月蘋風。周銀青之孤標也。再世蘭芽。陔南弗替。史冀公父子之純孝也。嬰兒樂育。以姓爲字。陳將樂俞順昌之深仁也。殺虎之威。同于驅鱷。姚夔州之異政也。于公治獄。民自不寃。袁光祿之神明也。一編麟經。以紹絕學。汪正奉之豐濬也。金橘不知。蕭然詩葉。望春先生之清貧也。卽以有負門牆。如舒信道者。其人不足稱。而文辭終屬甬上名筆。則五先生之淵源可知矣。

古靈同調

光祿章表民先生望之

章望之字表民。浦城人。少孤。喜問學。志氣宏放。爲文辯博。長于議論。初由伯父郇公蔭爲祕書省校書郎。

監杭州茶庫。逾年辭疾去。舉賢良方正。郇公在相位。以嫌捃之。乃上書論時政。凡萬餘言。不報。丁母憂。毀瘠過制。服除。浮游江淮間。犯艱苦。沒汲以營衣食。不自悔。人勸之仕。不應也。其兄拱之。知晉江縣。忤其郡守。守怒。誣以賊貶。先生號泣。力訴于朝。時守方貴顯。事不得直。先生訴不已。章十餘上。起獄數年。朝廷爲再劾。卒脫兄冤。復官如初。先生遂不復仕。覃恩遷太常太祝。大理評事。翰林學士。歐陽修韓絳知制誥。吳奎劉敞范鎮同薦其才。宰相欲稍用之。除僉書建康軍節度判官。不赴。又除知烏程縣。趣令受命。固辭。遂以光祿寺丞致仕。卒。先生喜議論。宗孟子言性善。排荀卿楊雄韓愈李翱之說。著救性七篇。歐陽修論魏梁爲正統。先生以爲非。著明統三篇。江南李旰江著禮論。謂仁義智信樂刑政皆出于禮。先生訂其說。著禮論一篇。其議論多有過人者。嘗北游齊趙。南汎湖湘。西至汧隴。東極吳會。山水勝處。無所不歷。有歌詩雜文數百篇。集爲三十卷。

助教黃聲隅先生晞

黃晞。字景微。建安人。少通經。聚書數千卷。學者多從之遊。自號聲隅子。著欬歔瑣微論十卷。以爲聲隅者。枿物之名。欬歔者。歎聲瑣微者。述辭也。石徂徠在太學。遣諸生以禮聘。召先生走匿鄰家。不出。樞密使韓魏公琦表薦之。以爲太學助教。致仕。受命一夕卒。

關學之先

殿丞侯華陰先生可

申先生顏合傳

侯可字無可。其先太原人。徙華陰。少倜儻不羈。以氣節自喜。既壯。盡易前好。篤志爲學。祁寒酷暑。未嘗廢業。博物強記。于禮之制度。樂之形聲。詩之比興。易之象數。天文地理。陰陽氣運。醫算之學。無所不究。自陝而西。多宗其學。先生亦以樂育爲己任。主華學之教者。幾二十年。再試不遇。遂棄其業。孫威敏公征儂智高。請先生參其軍事。奏凱。敍功。知巴州。化成縣。巴俗尙巫。而輕醫。先生誨以義理。巴人化之。娶婦多責財。于女氏。至有老弗能嫁者。先生爲定昏禮。又爲減官輸絲帛之賦。調耀州華原簿。痛抑富民之兼并者。誅奸胥。以大理評事僉書儀州判官韓忠獻公鎮長安。與先生謀渭源之地。至其境。以朝廷恩德。諭其酋豪。翌日詣軍門輸土。不費一矢。因蒸熟羊以撫之。嘗以數十騎行邊。猝與敵遇。乃分其騎爲四。令高其旗幟。旋山徐行。敵以爲有大兵而誘之也。避去。以忠獻薦。遷殿中丞。知涇陽縣。議復鄭白水利。得請。而讒者搆之。罷官去。不竟其施。以元豐己未卒。有申顏先生者。君子也。非法不言。非禮不履。關中之人。無老幼見之。坐者必起。與先生爲莫逆。顧皆貧。先生之未仕也。嘗與易衣互出。謀食以養。兩家有無均之。申顏先生嘗曰。吾不可一日失侯。無可。或問之曰。無可能。攻吾之過耳。申顏先生病。先生徒步千里。爲之求醫。未至而死。其目不瞑。或曰。是待侯先生而瞑乎。未斂。先生馳至。撫之而瞑。申顏先生嘗欲葬其先世。而未能。及死。無子。先生傾所有。不足。賣衣以益之。卒成其志。天寒。先生父子尙單衣。忽有饋白金者。謂其子曰。申顏先生之妹將嫁。速以資之。其好義如此。其卒也。戒其子勿用浮屠。先生之女兒適程氏。明道伊川二先生之母也。故明道志先生之墓。先生之孫。是爲荆門先生仲良。

祖望謹案。呂舍人本中曰。關學未興。申顏先生蓋亦安定泰山之儔。未幾而張氏兄弟大之。然則申

顏先生之有功關中亦已多矣。而先生爲之死生之友。觀其所學。非腐儒之無用者。而宋史僅著之。義士傳中。予故特表而出之。

蜀學之先

中允宇文止止先生之邵

宇文之邵。字公南。綿竹人。舉進士。爲文州曲水令。神宗卽位。求言。疏言公卿大夫民之表。宜先以節義廉耻風導之。凡所建置。必與大臣共議。以廣其善。號令威福。則專制之。疏奏不報。喟然曰。吾不可仕矣。遂致仕。以太子中允歸。時年未四十。自強于學。不易其志。日與交友。爲經史琴酒之樂。退居十五年而卒。司馬溫公曰。吾聞志不行。顧祿位如錙銖。道不同。視富貴如土芥。今子之邵見之矣。范蜀公亦曰。之邵位下而言高。學富而行篤。少我二十一歲。而先吾掛冠。使我慊然。其爲兩賢所推尙如此。參史傳。

士氏門人

趙先生狩別見泰山學案。

士氏私淑

縣尉李先生縑別見泰山學案。

劉氏家學

知州劉先生庠

劉庠字希道。子望之子也。八歲能詩。蔡齊妻以子。第進士。爲高密廣平院教授。英宗求直言。先生上書論

時事除監察御史裏行神宗立遷殿中侍御史爲右司諫言中國禦戎之策守信爲上除集賢殿修撰河東轉運使進天章閣待制河北都轉運使移知真定又爲河東都轉運召知開封先生不肯屈事王荆公荆公欲見之戒典謁者曰今日客至勿納惟劉尹來卽告我或語先生盍往見之先生曰見之何所言自彼執政未嘗一事合人情脫問青苗免役將何辭以對竟不往奏論新法又與蔡確爭廷參禮遂以龍圖閣直學士歷知渭州卒年六十四參史傳

劉氏門人

縣令曹先生起附見泰山學案

進士張先生洞別見泰山學案

吳氏家學

直閣吳先生師禮

吳師禮字安仲錢塘人師仁弟太學上舍賜第歷官右司員外郎工翰墨徽宗嘗訪以字學對曰陛下御極之初當志其大者臣不敢以末伎對終直祕閣知宿州遊太學時其兄爲正守春秋學他學官有惡之者條其疑問諸生先生悉以兄說對學官怒鳴鼓坐堂上衆質之先生引據三傳意氣自如江公望時在旁心竊喜後遂定交參史傳

楊氏門人

銀青王桃源先生說見下鄞江家學

鄧江家學

銀清王桃源先生說附子珩

王說字應求鄧縣人鄧江先生之從子也受學鄧江與弟該皆著名教授鄉里三十餘年熙寧中以特恩補州長史無田以食無麻桑以衣怡然自得子孫世其學子珩字彥楚大觀三年進士官宗正少卿參四明文獻集

雲濠謹案宋景濂守齋類藁序云昔在宋時桃源王應永亦鄧人同季父致招樓郁楊適杜醇諸公因就妙音院立孔子像講貫經史倡爲有用之學學者宗之應求所著唯在立言他則未暇及故有五經發源五十卷奏議書疏詩文二百十一篇薦者列其事召爲明州長史應求辭及旣沒勅建桃源書院贈銀青光祿大夫賜紫金魚袋

梓材謹案謝山宋神宗桃源書院御筆記云五先生之倡道其三皆以布衣終身卽仕者亦不達而先生獨邀宸奎之賜固異數也又案王一辰甬上三補者舊詩於先生傳云師仲父鄧江先生及楊先生適友杜先生醇樓先生郁是先生又爲大隱門人

縣令王望春先生該附子璿

王該字蘊之桃源先生之弟學者稱爲望春先生登慶歷六年進士王荆公宰鄧時與之友善以詩章相唱酬與兄齊聲令鄧城官舍旁有嘉木葉長可尺許每得一詩取葉書之旣卒歸囊蕭然惟脫葉甚富子璿字元圭元豐進士喜藏書以文稱參寶慶四明志